

Matyu 26



Ito ennem
nga algew
sacbay nito
Padaya Nitatalib,
nawé ngé Jésus ka
Bétanya. Itu ya ili né
Lasaru, nga igma to lalaki nga
pinagungar né Jésus itun. Ket to
Marya, namet itun ka isa
nga butilya nga
bangbanglu nga para labu.
Isa nga litru nga bangbanglu nga
naggayat ka mula nga nardu ya
mayan na, ket nangina nga unay, ta
tutu nga awan lauc na.



Ket
nibucbuc na
met to
bangbanglu kadiya
saka né Jésus, sé na
nipunas met ya ebbuc
na kadiya saka na.

Binumngaay ngarud ya ellab
nito bangbanglu ito baley.



Ket è Hudas Iskariyuté, nga isa kadito sangapulu ket duwa nga adalan, nawé itun kadito pangpangulu diya agsirsirbi iya Témplu, tasun makitulag nga iyawat na ngé Jésus igida.



Ket naragsakan da ngarud ito nagicna da to nibaga
né Hudas, ket kinariyan da nga écdan da kanu ka
kuwarta. Ket nagsicsiim ngarud
ngé Hudasin ka mayat nga
gundaway na nga
mangiyawat é
Jésus igida.



Ket tinungpal ngarud dito adalan to nibilin né Jésus. Ket iya agten iyan, nisagana da ya panggidam da nga panangilagip da ito Nitatalib. Ket ito mangmangan da pekkem, namet ngé Jésus ka tinapay, ket nagyaman é Apu Diyus ka kararag. Pinisepisey na to tinapay, sé na nécdé kadito adalan, nga kinunen na, “Alac nu yani, sé kanen nu. Idi ya beggic,” kunen na.




Ket kalpasan na, namet pè ngé Jésus ka paginuman. Nagkararag manin nga nagyaman é Apu Diyus, sé na nécde igida, nga kinunen na, “Uminum kayu kuma nga amin idi. Ta idi ya dagac, nga itu ya mangpalagda iya tulag né Apu Diyus. Maiyayus ya dagac nga agpaay kadiya adu nga toltoley, tasun mapakawan diya basbasul da.”




Ket kinunen nè Jésus é Pédro, “Ay, Simon, denggem yani nga ibagac ikew: Napalubusan ngé Satanas nga mangriribuc dakayu, nga maiyarig iya panagisap ka beggas tasun maisibna ya nabaru iya bekken nga nabaru. Ngem nikararagan naka é Apu Diyus, Pédro, tasun madi kuma mapukaw ya panamatim. Ket no sumoli nad ikew ya

nabileg nga panamatim iyaken,
masapul nga ikew mettas ya
mangpabileg kadiya padam
nga adalan,”
kunen na.



Ket kinunen ngarud nè Pédro igina, “Apu, sisasagana ngac met nga maibulun ikew, orey iya pagbaludan winno iya pakatayan,” kunen na. Ngem kinunen nè Jésus, “Ya kinapudnu na, Pédro, ita mettas nga gabi, sacbay niya panagtataraut diya kawitan no parbangun, namétlu nac nad met nga nilibac kin, nga kunem nad nga madi nac em-emmu,” kunen na.



Ket itun, nagbubulun dè
Jésus dito adalan na
nga nawé da iya isa nga
lugar nga managan ka
Gétsémani. Ket kinunen
na kadito adalan na,
“Agtugew kayu was idi,
ta mawé yac agkararag
antuni,” kunen na. Ket
kinunen na iya kararag
na, “Ama! Amac!
Mabalinam ya amin.”



“Ipac mu kuma yani nga panagsagaba nga lak-amec, nga rigat nga arig nga inumec. Ngem bekken kuma ngarud nga ya tarigagay ku ya matungpal, no di lugud ya tarigagay mu,” kunen na.



Ket iya agten iyan, nawé to Hudas antuni nga nibagnus na ya isa nga bungguy diya suldadu sè duduma nga guwardiya niya Tèmplu nga eb-ebbonen dito pangpangulu diya agsirsirbi iya Tèmplu sè dito Parisiyu. Nagtagi-dilag sè nagtagi-armas da met nga nawé.



Ket kinteb ngarud mettin nito isa igida ya tagabu nito kangatuwan nga agsirsirbi iya Témplu, ket napéngas met to diwanan nga tinga nito tagabu win. Ngem kinunen né Jésus, “Bay-an tida ya agten iyan!” kunen na. Ket sinécdéng na ya natalingu nga tinga nito tagabu, ket pinalaing nan.




Ket tinkem da ngarud ngé Jésusin, nga nipen da iya baley nito kangatuwan nga agsirsirbi iya Témplu. Ket è Pédro, tinumtumneb met igina. Ket dito uwed iya emwag nito baley, nagapuy da ka paginuduwan da iya tengnga nito emwag, ket nagtugtugew da ngarud iyanin. Ket è Pédro, nawé pé nakitugew igida.



Ket uwed pè isa nga toley
antuni nga isa kadito
tagabu nito kangatuwan
nga agsirsirbi iya
Témplu. Ket to tagabu,
kabagian met nito lalaki
nga pinéngas né Pèdru to
tinga na itun. Ket dinamag pè
nito tagabu è Pèdru nga
kinunen na, “Bekken kad nga
ikew to nasingec nga kabulun né
Jésus enna minuyungan?”
kunen na.



Ngem naglibac manin
ngé Pédrú, ket pag-isu
nga nagtaraut mettin
ya isa nga kawitan.
Ket rinumwar ngarud
ngé Pédrú iyan, ket
nagberrit ka napalausin.




Ket itun, amin dito pangpangulu nga naur-urnung iyan, nawé da nipen ngé Jésus iya edyan nito Gubèrnadur Pilatu. Ket è Pilatu, sinaludsud na ngarud è Jésus, “Tutu kad nga ikew ya Ari diya Hudyu?” kunen na. Ket kinunen né Jésus igma, “Nakagi mun,” kunen na.



Ngem è Jésus met ya gabay né
Pilatu nga iruwar. Itu nga binaliwan
na ngarud manin to kinagi na kadito
toltoley. Ngem dito toltoley,
nip-ipkaw da manin nga kinunen da,
“Pailansam! Pailansam
ka krus!” kunen da.



Ket iya agten iyanin, niyawat né Pilatu ngé Jésus igidan tasun mailansa ka krus. Ket itun, nimet da ngarud ngé Jésus, sé da niruwar iya siyudad nga Hérusalém, nga bugbugtungen na met ya krus na. Ket nipen da iya lugar nga maawagan ka Gulguta, nga itu ya kagi Hébriyu nga kayat na nga kagiyen, “Edyan Bangabanga.”




Ket antuni nin to nangilansaan da igina ka krus. Ket uwed met pè duwa nga lalaki itun nga naikumpas è Jésus, nga nailansa pè kadiya krus da.

Nagsumbangir diya krus da iya abay niya krus né Jésus, ket nagkintengnga ngé Jésus.




Ket nagpaut to gicbet agingga ka alas trés iya gidam,
ta nagpukaw met ya darang niya sinag. Ket enna
Témplu, napigis met itun nga nagudduwa ngin to
kurtina nga nanglinged iya uneg na.

Ket è Jésus ito krus na,
nagpekkaw met nga kinunen
na ka nabileg, “Ama, italec ku
ikew ya kararuwac,” kunen
na. Ket ito nakagi na yanin,
awan anges nan.



Ket itun, uwed isa nga toley nga nagtured nga nawé ito edyan né Gubérnadur Pilatu. Nawé ngarud nagadeng ka pammalubus né Pilatu nga alac na ya bangkay né Jésus, ta gumidam mettin. Ket yan




nga toley, ket é Husé nga taga-Arimatiya, nga isa nga mabigbig nga kunséhal diya Hudyu. Ket igina pé ya isa nga mangpadpadaan nga sinanama iya umbét nga panangituray né Apu Diyus.



Ket nawé ngarud ngimina ngé Husé
ka luput nga maawagan ka linén.

Ket ito naidsag na to
bangkayin, kinubit na ito
luput nga linén, sé na
nipisuc iya isa nga
tamen nga
nailiyang ka
batu.



Ket kalpasan na,
nangbukalig ka
dackel nga batu
nga nanggiset na
ito tamen.



Ket ito kadamlag na, itu ya Algew
Ngilin nga simarunu ito Algew
Panagisagana. Ket dito
pangpangulu dito
agsirsirbi iya Témplu,
sé dito Parisiyu, nawé
da naguurnung iya
sangu nito
Gubérnadur
Pilatu.




Ket kinunen da, “Apu, malagip mi
nga ito sibibiyag pekkem
to mangal-allilaw nga
toley, kinunen na nga,
‘Kalpasan nad niya tellu
nga algew, agungar
rac,’ kunen na met
itun.”



“Ket iya agten iyan, nawé da ngarud. Ket nipasnec da nga tutu to panangbantay da ito tamen, nga uwed nibaldeng da nga pakadlawan da ito ruwangan na, sè pinabantayan da pé yin.”



Ket ito nalabes sin to Algew Ngilin, ito
gibegibet pekkem iya agsapa niya
Duminggu, nawé siningen dè
Marya nga iMagdala sè to
isa pé nga Marya to
tamen. Ket ya
napasamac itun,
uwed met
nakabilbileg nga
yegyeg.



Ket nairana met yan iya
panagdessag niya isa nga
anghèl né Apu Diyus
manipud ka langit. Ket
nawé na nibukalig to
dackel nga batu nga
naigiset ito tamen,
ket nagtugawan
nan.



Ket nagpilpilpig
ngarudin dito
guwardiya gapu
ito ansing da ito
anghèl, ket arig
da nga natey yin.



Ket to anghèl, kinunen na kadito
babey, “Madi kayu mansing.

Emmuc nga sapsapulen nu
ngé Jésus nga nailansa ito
krus. Awan met idi nin.

Ta nagungarin, nga
agten mettas ito
kinunen na. Umbèt
nu singen to



nakaipaidaan
na itun.”




Ket gapu ito nasingen sè nagicna dito
babey, naalistu da nga pimanawin ito
edyan nito tamen, nga siaansing
dan, sè siaanggem da met pè yin.
Ket nanagtag da nga nawè
mangibaga kadito adalan né
Jésus.



Ket ito uwed dito babey ito dalanin, uwed met iyanin ngé Jésus nga simabet igida. Ket kinablaawan na da. Ket imadenni da ngarud é Jésus, nga nagparintumeng da nga nicman da diya saka na, ket nagdaydayaw da igina.





Ket itun, nagpasingen pè ngè Jésus kadito sangapulu
ket isa nga adalan na, ito nagsasangu da nga
mangmangan. Ket dinanengdengngan na da ngarud
gapu ta di da gabay ya mamati, sè gapu ta nasukir da.
Ta madi da met namati iya kagi dito nakasingen igina
kalpasan nito panagungar na. Ket itun, kalpasan nito
pannakitbar nè Apu Jésus igida, ket naipangudu ka
langitin. Ket enna langit, nagtugew iya kadayawan nga
edyan, nga itu ya madiwanan nè Apu Diyus.



Tutu met yan, ta gapu iya napalaus nga
panagayat nè Apu Diyus kadiya toltoley
idi nga lubung, niyawat na ya kackaisu
nga Anac na, tasun amin nga mamati
igina, madi mapukaw, no di lugud
maècdn ka agnanayun
nga biyag.



Ruma 3:23 Ta amin tida, nagbasul tida met, ket awan dactida ya makabael nga mairaman iya nadayaw nga kasasaad né Apu Diyus.

Ruma 6:23 Ta ya supapac niya basul, ket patey. Ngem biyag nga agnanayun met nga gennung ya isagut né Apu Diyus dactida gapu iya pannakaibulun tida é Kristu Jésus nga Apu tida.

Hébriyu 9:27 Ket no dactida nga toley, sigud nga naikeddeng nga matey tida ka maménsan, ket kalpasan na, uwed pé yin ya panangukum né Apu Diyus.



Epésu 2:8,9 Ta gapu was iya siaayat nga asi né Apu Diyus, ket naisalakan kayu ngarud gapu iya panamati nu. Ket ya pannakaisalakan nu, bekken ngarud nga gapu iya bukud nu nga winangel, no di lugud gapu ta nikaasi né Apu Diyus dakayu. Ta no mabalin tida nga maisalakan kuma gapu was iya winangel tida, mabalin nga uwed pagtangsit tida. Ngem bekken met nga agten iyan.

Ruma 10:9,10 Ket idi ngarud ya banag niya kagi nga ikaskasaba mi: No ibalikas mu nga ipakaemmum nga tutu nga è Jésus ya ibilang mu nga Apum, sè no patiyem iya lemlemmet mu nga igma ket pinagungar ngarud né Apu Diyus, ket maisalakan ka nad met.

Ta gapu iya panamati tida nga tumaud iya lemlemmet tida, maibilang tida nga nalinteg iya imatang né Apu Diyus. Ket sè gapu pé iya panangibalikas tida nga panangipakaemmu tida maipanggep iya panamati tida, ket maisalakan tida.



Juan 3:16,17 Tutu met yan, ta gapu iya napalaus nga panagayat nē Apu Diyus kadiya toltoley idi nga lubung, niyawat na ya kackaisu nga Anac na, tasun amin nga mamati igina, madi mapukaw, no di lugud maecdan ka agnanayun nga biyag.

Ta nibon nē Apu Diyus ya Anac na idi nga lubung tasun maisalakan kuma diya toley gapu igina, nga bekken nga tasun ukumen na da.

1 Juan 5:11-13 Ket ya banag nidi nga panangipanecnec nē Apu Diyus maipanggep iya Anac na, agten idi: Nēcdan nactida ngē Apu Diyus ka agnanayun nga biyag, ket ya Anac na mettas ya paggayatan niyan nga biyag.



Matyu 26-28; Lukas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Adasen (tui) © 1990 New Tribes Mission, Sanford, FL
32771-1487, USA. Printed in the Philippines.

<https://www.bible.com/en-GB/bible/2812/MAT.1>

©2025 Bible for Children, Inc.

www.M1914.org

www.bibleforchildren.org

